



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Selasa, 12 April 2022	
1.	Jabatan Khidmat Veterinar tak temui virus rabies
2	Sampel anjing negatif rabies
3	Selangor tiada peruntukan khas tangani rabies
4	Kita banyak sangat makan ayam

DISEDIAKAN OLEH:

**SEKSYEN KOMUNIKASI KORPORAT
JABATAN PERKHIDMATAN VETERINAR MALAYSIA**

Jabatan khidmat veterinar tak temui virus rabies

Shah Alam: Tiada virus Rabies dikesan dalam kalangan anjing yang berkeliaran dalam satu kilometer radius indeks kes menerusi surveilan dan persampelan yang dilaksanakan Jabatan Perkhidmatan Veterinar (DVS).

DVS dalam kenyataan memaklumkan, jabatan itu mengaktifkan surveilan dan persampelan bagi mengesan rabies terhadap anjing yang berkeliaran susulan kematian seorang lelaki warga tempatan di daerah Petaling pada 10 Mac lalu yang disahkan akibat jangkitan rabies.

"Setakat ini, keputusan ujian Makmal Veterinar menggunakan teknik ujian Direct Fluorescent Antibody Test (DFAT) daripada sampel yang diambil menunjukkan, negatif terhadap virus rabies.

"DVS akan terus mengaktifkan surveilan dan persampelan dalam kalangan anjing berkeliaran di daerah Petaling untuk mengesan rabies.

"Sehingga kini, tiada aduan membabitkan kematian anjing dijangkiti rabies atau yang menjurus kepada tanda klinikal rabies di Selangor," menurut kenyataan itu.

Menerusi kenyataan itu, DVS turut memaklumkan bahawa program kawalan rabies dijalankan secara berterusan di seluruh negara.

DVS berkata, hasil pemantauan dan ujian makmal (DFAT) ke atas sampel yang diuji selama ini menunjukkan tiada rabies dikesan.

"Orang awam dinasihatkan supaya segera melaporkan ke Pejabat Perkhidmatan Veterinar yang terdekat jika terdapat perubahan tingkah laku pada anjing sama ada menjadi agresif atau dungu.

"Kes gigitan anjing perlu segera dilaporkan ke Pejabat Perkhidmatan Veterinar dan mendapatkan rawatan di klinik atau hospital berdekatan.

"DVS juga menasihatkan orang awam tidak panik dan memberi kerjasama dalam menangani kes rabies dalam kalangan haiwan," kata kenyataan itu.

Terdahulu pada Ahad lalu, Jabatan Kesihatan Negeri Selangor (JKNS) menerusi kenyataan memaklumkan bahawa berlaku kematian seorang lelaki warga tempatan di daerah Petaling pada 10 Mac disahkan akibat jangkitan rabies.

Pengarah Kesihatan Selangor, Datuk Dr Sha'ari Ngadiman, berkata perkara itu disahkan pada Isnin (4 April) lalu selepas keputusan ujian makmal diperoleh.

Beliau berkata, mangsa berusia 40 tahun itu meninggal dunia di rumahnya.

Sampel anjing negatif rabies

Shah Alam: Tiada virus rabies dikesan pada anjing yang berkeliaran di Petaling Jaya menerusi persampelan dilaksanakan Jabatan Perkhidmatan Veterinar (DVS).

DVS dalam kenyataan memaklumkan, jabatan itu mengaktifkan surveilan dan persampelan bagi mengesan rabies terhadap anjing berkeliaran susulan kematian seorang lelaki warga tempatan di daerah Petaling pada 10 Mac lalu yang disahkan akibat jangkitan rabies.

“Setakat ini keputusan ujian Makmal Veterinar menggunakan teknik ujian *Direct Fluorescent Antibody Test* (DFAT) dari sampel diambil menunjukkan negatif

terhadap virus rabies.

“DVS terus mengaktifkan surveilan dan persampelan di kalangan anjing berkeliaran di daerah Petaling untuk mengesan rabies.

“Sehingga kini, tiada aduan membabitkan kematian anjing dijangkiti rabies atau yang menjurus kepada tanda klinikal rabies di Selangor,” kata kenyataan itu, semalam.

Menerusi kenyataan itu, DVS turut memaklumkan program kawalan rabies dijalankan secara berterusan di seluruh negara.

Jelas DVS, hasil pemantauan dan ujian makmal (DFAT) ke atas sampel yang diuji selama ini menunjukkan tiada rabies dikesan.

Selangor tiada peruntukan khas tangani rabies

Penyakit berkenaan dianggap bukan bersifat endemik seperti demam denggi

Oleh ENSKU SHARIFUL AZNI

SHAH ALAM

Kerajaan Selangor tidak mempunyai peruntukan khas untuk menangani penyakit rabies kerana ia bukan bersifat endemik seperti demam denggi.

Exco Kesihatan Awam, Perpaduan, Wanita dan Keluarga Selangor, Dr Siti Mariah Mahmud berkata, bagaimana pun terdapat tiga jabatan bertanggungjawab mengekang penularan penyakit tersebut iaitu Jabatan Perkhidmatan Veterinar (DVS), Jabatan Kesihatan Negeri Selangor (JKNS) dan pihak berkuasa tempatan (PBT).

“Walaupun penyakit bawaan binatang ini di bawah DVS, namun dua jabatan lain iaitu JKNS perlu mengendalikan pesakit virus tersebut manakala PBT membuat kawalan ke atas



Kerajaan Selangor akui tidak mempunyai peruntukan khas untuk menangani penyakit rabies kerana ia bukan bersifat endemik seperti demam denggi.

haiwan terbiar khususnya anjing liar,” katanya ketika dihubungi pada Isnin.

Siti Mariah berkata, rakyat di negeri ini diminta memberikan kerjasama kepada pihak berkuasa untuk mengawal populasi anjing liar yang boleh mendatangkan penyakit tersebut.

Menurutnya, pihak PBT mengalami kesukaran untuk menangkap haiwan berkenaan susulan terdapat segelintir individu yang menyukarkan operasi tersebut dijalankan.



SITI MARIAH

Pada Ahad, JKNS memaklumkan terdapat satu kes kematian membabitkan seorang lelaki warga tempatan disahkan dijangkiti rabies pada 4 April lalu.

Pengarah Kesihatan Selangor, Datuk Dr Sha'ari Ngadiman menerusi satu kenyataan di Facebook JKNS memaklumkan, mangsa berusia 40 tahun dan menetap di daerah Petaling meninggal dunia di rumah pada 10 Mac lalu.



GAJALAKKAN petani-petani yang berjaya termasuk generasi muda menanam jagung.

Kita banyak sangat makan ayam

SAUDARA PENGARANG,

DAGING ayam adalah sumber protein haiwan yang penting dan popular dalam kalangan penduduk berbilang etnik di negara ini. Malaysia merupakan antara negara pengguna daging ayam tertinggi di dunia dengan penggunaan per kapita tahunan 46.8 kilogram (kg.) dan dijangka mencapai 50 kg. menjelang 2025.

Ini menunjukkan penggunaan daging ayam per kapita tahunan Malaysia adalah yang ketiga tertinggi di dunia dan yang pertama di Asia. Oleh itu, tidak hairanlah tahap sara diri bagi daging ayam yang mencukupi merupakan antara agenda penting dalam Dasar Agro Makanan Negara 1.0 dan 2.0.

Pertambahan penduduk menyebabkan peningkatan permintaan terhadap daging ayam kerana ia merupakan salah satu sumber protein termurah untuk semua peringkat pendapatan terutama bagi golongan berpendapatan rendah (B40) dan sederhana (M40).

Namun, harga ayam yang murah hanyalah tinggal kenangan kerana harga ayam memperlihatkan trend peningkatan berterusan bermula dari Mac sehingga September 2021. Harga runcit ayam proses standard telah pun melepasi paras RM9 sekg. apabila mencecah RM10 pada awal September 2021.

Keprihatinan kerajaan menyebabkan harga ayam diturunkan dan kini harga runcit maksimum ayam standard adalah RM8.90 sekg di mana harga runcit baharu ini disubsidi oleh kerajaan sehinggalah kos pengeluaran menjadi lebih stabil.

Mengapakah kos pengeluaran ayam meningkat? Lebih 65 peratus daripada kos pengeluaran ayam melibatkan kos makanan ayam. Hampir empat juta tan jagung serta soya yang digunakan sebagai makanan ayam diimport setiap tahun oleh Malaysia. Kedua-dua sumber protein ini diimport terutama dari Brazil dan Argentina.

Bagaimanapun, penuaian komoditi jagung serta soya di kedua-dua negara ini menunjukkan penurunan disebabkan oleh kemarau berterusan sehingga menyebabkan

harga meningkat.

Menurut Gabungan Persatuan Peladang Ternakan Malaysia (FLFAM), jagung dan soya yang digunakan sebagai makanan ayam meningkat sekurang-kurangnya 40 peratus dalam tempoh setahun lalu.

Harga minyak kelapa sawit yang ditambah kepada makanan ternakan juga meningkat sebanyak 43.3 peratus daripada RM3,000 kepada RM4,300 setiap tan dalam tempoh sama.

Selain kos makanan ayam, industri ini turut berhadapan dengan peningkatan kos buruh. Memang tidak dapat dinafikan bahawa industri ayam adalah berintensifkan buruh. Kos operasi ladang ayam telah meningkat semasa pandemik Covid-19. Pekerja ladang perlu hadir secara fizikal dan pandemik telah menjejaskan kehadiran mereka ke ladang.

Adalah tidak mampan bagi Malaysia untuk terus bergantung kepada bahan mentah yang diimport bagi menghasilkan makanan ayam. Beberapa perancangan jangka pertengahan serta panjang perlu dilaksanakan bagi menstabilkan harga ayam.

Pertamanya, Malaysia perlu mencari sumber alternatif bahan mentah tempatan bagi memastikan kos makanan ayam berpatutan. Langkah ini boleh dilaksanakan dengan menggalakkan petani-petani yang berjaya termasuk generasi muda menanam jagung.

Kedua, digunakan mesin dan peralatan lain dalam sektor penanaman jagung bermula dari awal penanaman hingga ke penuaian. Malahan mesin dan peralatan juga diperlukan selepas proses penuaian untuk mengelakkan pembaziran.

Ketiga, gunakan sisa pertanian termasuk daripada kelapa sawit serta sisa dari dapur sebagai bahan mentah dalam makanan ayam. Sisa terbit ini tidak diurus dengan berkesan sekali gus menyebabkan kemudaratan alam sekitar dan menjejaskan kesihatan serta kesejahteraan rakyat.

**PROFESOR MADYA DR. SHRI
DEWI APPLANAIDU**
Universiti Utara Malaysia (UUM)